

Turismo a progresa cu paso gigantesco

Ministro Don Mansur

ORANJESTAD (AAN)—

Tabata Ministro Don Mansur di Asuntonan Economico y Turismo, cu a duna un resumen di e desaroyo den sector di turismo y a trece dilanti, cu cifras, con turismo na Aruba ta progreso cu paso gigantesco.

Ministro Mansur a trece dilanti cu Gobierno a fiha e obhetivo pa redobla e cantidad di cambernan di hotel durante e periodo di gobernacion. Manera desaroynon ta indica, Gobierno seguramente lo alcanza su obhetivo.

Mientrastanto a sali dilanti cierto preocupacion si por yena e cambernan nobo cu a keda construi. Ministro Mansur a splica cu Gobierno a dicidi pa un acercamente profesional y esey a trece cune cu a busca servicionan di empresanan experto y renombra manera Pannel, Kerr and Forster y tambe un compania di publicidad na Merca. Nan ta realiza un labor fabuloso.

Segun Ministro Mansur, resultado di e maneho ta, cu e cantidad di cambernan disponible pa turistanan a conoce un crecimiento cu 25 porciento, mientras cu e cantidad di turistanan cu a bishita Aruba a subi tambe cu 25 porciento na aña 1987, cu tabata un bon aña pa turismo.

E mercado principal na 1987 tabata Merca, pero no por descarta otro mercadonan cu a conoce un crecimiento fuerte, manera e mercado Venezolano, cu a subi cu 15 porciento.

MENOS CHARTER MAS VUELO REGULAR

Un di e puntanan importante pa turismo ta e forma cu ta trece turistanan Aruba. Den esaki por a nota cierto cambionan na 1987, compara cu aña anterior.

Na 1987, 82 porciento di turistanan cu a bini Aruba a bini cu vuelonan regular y e resto cu charter. Esaki ta un indicacion cu e esfuerzo pa enfatisa vuelonan regular, a duna fruto.

E hecho cu awor ma-

Na aña 1987, turismo na Aruba a conoce un aumento di 25 porciento den tanto e cantidad di cambernan como cantidad di turistanan. Ta spera cu na aña 1988 turismo lo conoce un crecimiento di 33 porciento. Na Europa Aruba a bira un destinacion popular mientras cu turistanan Venezolano a regresa.

yoria di turista ta opta pa bini cu vuelo regular y no cu charter, ta subraya e politica cu Gobierno a hiba, esta di dirigi e atencion ariba vuelonan regular envez di charter. Esaki ta trece cune, mas transporte na nivel y na horanan regular.

CIFRANAN FABULOSO PA JANUARI Y FEBRUARI

Mientrastanto Aruba ya a registra cifranan fabulosos pa Januari y Februari.

Na Februari turismo a bay dilanti cu 32 porcien-

to, compara cu 1986, ora ya a registra progreso.

Ministro Mansur a splica cu pa loke ta trata Februari, turismo for di Merca a conoce un aumen-

to cu 35 porciento, mientras cu for di otro partinan di mundo tambe, hopi mas tanto turista a yega Aruba.

Esaki ta indica cu e pasonan pa diversifica e mercado turistico a duna resultado y cu e aumento den e cantidad di turistanan for di otro partinan di mundo, a surpasa e porciento den crecimiento di turismo for di Merca.

Segun Ministro Mansur e cifranan ta indica, cu si calcula e resultadonan di

Januari y Februari, por tene cuenta cu na 1988, turismo lo conoce un crecimiento cu un tercera parti pa loke ta trata e cantidad di turista cu ta bishita Aruba, loke lo significa cu hasta e obhetivo ta worde surpasa.

ARUBA TA HOT HOT NA EUROPA

Na luna di Februari por a registra un aumento cu

80 porciento den e cantidad di turistanan cu ta bishita Aruba for di Venezuela. E cantidad di bishitantenan for di Ecuador a aumenta cu 800 porciento.

Crecimiento fuerte a keda registra tambe den e cantidad di turistanan cu ta bishita Aruba for di Europa, caminda tin gran entusiasmo pa Aruba.

Recientemente un delegacion Arubano a participa na e bolsa ITB na Berlin y e mensahe cu nan a trece ta cu Aruba ta "hot-hot"

na Europa, como un di e destinacionnan mas populares.

Esaki lo tabata tin influencia ariba KLM cu a dicidi di introduci su di cinco vuelo pa siman ya na April pa na Juni introduci e di 6 vuelo pa siman. Esey ta indica cu casi tur dia, esta cu excepcion di un solo dia pa siman, lo tin vuelonan entre Europa y Aruba cu KLM.

Ministro Mansur a bisa cu e situacion di Dollar a haci di Aruba un destinacion solicita na Europa y na su turno a haci Europa un mercado sumamente atractivo pa Aruba.

E problema ta keda transportacion aereo, pero ta traha duro cu KLM mientras ta busca formanan pa trece otro companianan for di otro ciudadnan di Europa.

Esaki, manera Ministro Mansur a señala, lo significa cu turismo lo conoce un mehoranza considerable, cu lo significa mas progreso pa turismo, cu ta duna mihor resultado cu a spera segun obhetivonan cu a worde fiha.

Banda peligroso deteni

ORANJESTAD (AAN)

Ayera, Recherche y Polisnan especialmente equipa a sali pa dos hotel, na unda nan a tene un razzia den un camber di Hotel Concord y otro na Caribbean Village.

Segun informacionnan cu DIARIO a logra obtene ta indica cu for di basta dia caba tabata tin informacion cu na Aruba lo a yega un persona sospecha di ta envolvi den un robo formal na Isla Ariba, for di unda un grupo a logra bay cu \$500,000.--

Di fuenteran ayega na DISIP y Interpol, DIARIO a logra e informacion cu nan agentenan tabata tras di e sospechoso ya cu e lo tabata envolvi tambe den robonan di banco, pa cual motibo nan taba-

ta andando su tras.

Autoridadnan local lo a ser avisa pa tene cuenta cu e persona indica, ya cu sospechonan grandi ta existi cu e lo por tabata envolvi tambe den e robo di banconan cu a tuma lugar na Aruba algun aña pasa.

Autoridadnan local a sigui e pasonan di e persona señala y a nota cu e tin contacto cu 3 otro persona y di repente el a move di un hotel pa otro, pa despista nan. E persona aki, procedente di Venezuela, kier a desvia atencion di autoridadnan cu e tabata tin contacto cu e otro tres personanan.

Segun informacionnan obtene, e grupo tabata tin den nan poder armanan pisa, sin cu autoridadnan local por a localiza nan antes di e razzia.

Polisnan na Aruba a

tene un reunion di staff y a planea nan estrategia, pa evita y preveni e asalto cu e grupo tabata tin pensa di ehecuta contra institu-

cionnan bancario na Aruba. Asina polis a dicidi di forma dos grupo di comando pa bay ataca e dos

Segui lesa pag. 14



Esaki ta e mapa di hotel Aruba Plaza cu lo bay worde construi banda di Eagle Beach na otro banda di Boulevard. E hotel ta di 4 strea, 470 camber y suites, restaurant, bar, swimming pool, tennis courts, shopping area etc.